

萬有文庫

第一集一千種

王雲五主編

王臨川集

(二)

王安石著

商務印書館發行

臨川先生文集

(二)

王安石著

國學基本叢書

萬有文庫

第一集一千種

總編纂者

王雲五

商務印書館發行

臨川先生文集

卷一

古詩

元豐行示德逢

四山脩脩映赤日。田背坼如龜兆出。湖陰先生坐草室。看踏溝車望秋實。雷蟠電掣雲滔滔。夜半載雨輸
亭臯。旱禾秀發埋牛尻。豆死更蘇肥莢毛。倒持龍骨挂屋敖。買酒澆客追前勞。三年五穀賤如水。今見西
成復如此。元豐聖人與天通。千秋萬歲與此同。先生在野故不窮。擊壤至老歌元豐。

後元豐行

歌元豐。十日五日一雨風。麥行千里不見土。連山沒雲皆種黍。水秧綿綿復多稌。龍骨長乾挂梁梠。鱗魚
出網蔽洲渚。荻筍肥甘勝牛乳。百錢可得酒斗許。雖非社日長聞鼓。吳兒蹋歌女起舞。但道快樂無所苦。
老翁塹水西南流。楊柳中間杙小舟。乘興欹眠過白下。逢人歡笑得無愁。

夜夢與和甫別如赴北京時和甫作詩覺而有作因寄純甫

水菽中歲樂。鼎茵暮年悲。同胞苦零落。會合尙悽其。況乃夢乖闊。傷懷而賦詩。詩言道路寒。乃似北征時。
叔兮今安否。季也來何遲。中夜遂不眠。輾轉涕流離。老我孤主恩。結草以爲期。冀叔善事國。有知無不爲。
千里永相望。昧昧我思之。幸唯季優遊。歲晚相攜持。於焉可晤語。水木有茅茨。晚蘭佇歸憩。遶屋正華滋。

純甫出釋惠崇畫要予作詩

畫史紛紛何足數。惠崇晚出吾最許。早雲六月漲林莽。移我儵然墮洲渚。黃蘆低摧雪翳土。鳬鴈靜立將儔侶。往時所歷今在眼。沙平水澹西江浦。暮氣沈舟暗魚罟。欹眠嘔軋如聞撈。頗疑道人三昧力。異域山川能斷取。方諸承水調幻藥。灑落生綃變寒暑。金坡巨然山數堵。粉墨空多真漫與。大梁崔白亦善畫。曾見桃花淨初吐。酒酣弄筆起春風。便恐漂零作紅雨。鸞流探枝婉欲語。蜜蜂掇蕊隨翅股。一時二子皆絕藝。裘馬穿羸久羈旅。華堂豈惜萬黃金。苦道今人不如古。

徐熙花

徐熙丹青蓋江左。杏枝偃蹇花婀娜。一見真謂值芳時。安知有人槃礴羸。同朝衆史共排娼。亦欲學之無自可。錦囊深貯幾春風。借問此木何時果。

燕侍郎山水

往時濯足瀟湘浦。獨上九疑尋二女。蒼梧之野煙漠漠。斷壠連岡散平楚。暮年傷心波浪阻。不意畫中能更覩。燕公侍書燕王府。王求一筆終不與。奏論讞死誤當赦。全活至今何可數。仁人義士埋黃土。祇有粉墨歸彝楮。

陶緝菜

江南種菜漫阡陌。紫芥綠菘何所直。陶生畫此共言好。一幅往往黃金百。北山老圃不外慕。但守荒畦斷荆棘。陶生養目渠養腹。各以所能爲物役。

己未耿天隲著作自烏江來予逆沈氏妹於白鷺洲遇雪作此詩寄天隲辛酉冬天隲復來誦之

遂書于壁請天隲書所酬于右

朔風積夜雪。明發洲渚淨。開門望鍾山。松石皓相映。故人過我宿。未盡躋攀興。而我方渺然。長波一歸艇。款段庶可策。柴荆當未暝。與子出東岡。牆西掃新徑。

招約之職方并示正甫書記

往時江總宅。近在青溪曲。井滅非故桐。臺傾尙餘竹。池塘三四月。菱蔓芙蕖覆。蒲柳亦競時。冥冥一川綠。方坻最所愛。意謂可穿築。欲往無舟梁。長年寄心目。故人晚得此。心事付草木。消搖欄宇新。攬結蹊蹊熟。更能適我願。中水開茆屋。鬼營誅荒梗。人境掃喧黷。濠魚淨留連。海鳥暖追逐。豈無方外客。於此停高躅。憶初桑落時。要我豈非夙。蠶眠忽欲老。一个未言速。當緣東門水。尙澀南浦舳。吾廬雖隱翳。賞眺還自足。橫陂受後澗。直塹輸前瀆。跳鱗出重錦。舞羽墮輕玉。碧筩遞舒卷。紫角聯出縮。千枝孫嶧陽。萬本母淇澳。滿門陶令株。彌岸韓侯藌。尙復有野物。與公新聽矚。金鈿擁蕪菁。翠被敷苜蓿。蝦蟆能作技。科斗似可讀。樞軒俯北渚。花氣時度谷。耘耔聊效顰。締構行可續。荒乘儻不倦。一晝敢辭卜。雖無北海酒。乃有平津肉。脩脩仙李枝。城市久煩促。寄聲與俱來。蔭我臺上穀。

同王濬賢良賦龜得升字

世傳一尾龜。百齡此龜逮見隋唐興。雖然天幸免焦灼。想屢縮頸愁嚴凝。前年赴海不量力。欲替鼈負三峻嶒。番禺使君邂逅見。知困簸蕩因嗟矜。疾呼余且設網取。以組系首繩穿繩。北歸與俱度大庾。兩夫最

飄苦不勝。艤船秦淮。擔送我云。此一可當十朋。昔人寶龜。謂神物。奉事槁骨。尤兢兢。殘民滅國。遞爭奪。有此乃敢。司黎蒸。於時覩甲別貴賤。太卜藏法。傳昆仍。豈如元君。須見夢。初知歡喜。得未曾。自從九江罷納。錫衆漁賤。棄秋不登。卜人官廢。亦已久。果獵誰復知。殊稱。今君此寶。世莫識。我亦坐視心。營營。檣牀。纔堪比瓦礫。常粟孰肯捐。斗升糝頭腥。臊何足嗜。曳尾污穢。適可憎。盛衰除。轉豈必驗。蹈背出險。安敢憑。刳腸以占。幸無事。卷殼而食。病未能。如聞翁息。可視效。乃往有墮崖千層。仰窺朝陽。俯引氣。亦得難老。如岡陵。諒能學此真壽類。世論妄以蟲疑冰。嗟余老矣。倦呼吸。起晏光景。難瞻承。但知故人所玩惜。每戒異物相侵陵。唯憂盜賊。今好卜。夜半刳請。無威懲。復恐嚙夫負之走。并竊老木爲薪爇。淺樊荒圃。不可保。守視且寄鍾山僧。

示元度營居牛山園作

今年鍾山南。隨分作園囿。鑿池構吾廬。碧水寒可漱。溝西雇丁壯。擔土爲培塿。扶疎三百株。蒔棟最高茂。不求鸛鵲實。但取易成就。中空一丈地。斬木令結構。五楸東都來。斲以遶簷溜。老來厭世語。深臥塞門竇。贖魚與之遊。餒鳥見如舊。獨當邀之子。商略終宇宙。更待春日長。黃鸝弄清晝。

仲明父至宿明日遂行

初登張公門。公子始冠幘。於今見公子。與我偕鬢白。山林坐語笑。宛我在公側。豈惟貌如之。侃侃有公德。憶公營懶鄉。許我歸作客。我歸公旣逝。惆悵難再得。得子如得公。交懷我忻戚。漂搖將安往。稅駕止一昔。寤言且勿寐。庶以永今夕。何時復能還。裹飯治城宅。

杏花

石梁度空曠。茅屋臨清炯。俯窺嬌饒杏。未覺身勝影。嬌如景陽妃。含笑墮宮井。招徠有微波。殘粧壞難整。奉酬約之見招

君家段干木。爲義畏人侵。馮軾信厚禮。踰垣終褊心。川坻寧有此。園屋諒非今。雨過梅柳淨。潮來蒲稗深。種芳彌近渚。伐翳取遙岑。清節亦難尙。曠懷差易尋。子猷憐水竹。逸少愜山林。況復能招我。親題漢上襟。寄吳氏女子

伯姬不見我。乃今始七齡。家書無虛月。豈異常歸寧。汝夫綴卿官。汝兒亦摺綬。兒已受師學。出藍而更青。女復知女功。婉孌有典刑。自吾捨汝東。中父繼在廷。小父數往來。吉音汝每聆。既嫁可願懷。孰如汝所丁。而吾與汝母。湯熨幸小停。丘園祿一品。吏卒給使令。膏粱以晚食。安步而車駟。山泉皁壤間。適志多所經。汝何思而憂。書每說涕零。吾廬所封殖。歲久愈華菁。豈特茂松竹。梧楸亦冥冥。菱荷美花實。瀾漫爭溝涇。諸孫肯來遊。誰謂川無舲。姑示汝我詩。知嘉此林垌。末有擬寒山。覺汝耳目癢。因之授汝季。季也亦淑靈。贈約之

君胸塞而痞。我齒熱以搖。無方可救藥。相值久無謬。欲尋秦越人。魂逝莫能招。但當觀此身。不實如芭蕉。寄楊德逢

山樊老憚暑。獨寤無所適。湖陰宛在眼。曠若千里隔。遙聞青秧底。復作龜兆坼。占歲以知子。將勤而後食。穿溝取西港。此計當未獲。脩脩兩龍骨。豈得長掛壁。晤言久不嗣。作苦何時息。炎天不可觸。悵望新春白。

再次前韻寄楊德逢

一雨洗炎蒸。曠然心志適。如輸浮幢海。滅火十八隔。俯觀風水涌。仰視電雲坼。知公開霽後。過我言不食。翻然陂路長。泥淖困臧獲。明明吾有懷。如日照東壁。莫逢田父歸。倚杖問消息。渠來那得度。南蕩今已白。

仲明父不至 張名軒民仲明父其字也

月出映溝坻。煙升隱墟落。寒魚占窟聚。暝鳥投枝泊。亭臯閉晚市。隴首歸新穫。佇子終不來。青燈耿林壑。

與呂望之上東嶺

靖節愛吾廬。猗玗樂吾耳。適野無世誼。吾今亦如此。紛紛舊可厭。俗子今掃軌。使君氣相求。眷顧未云已。追隨上東嶺。俯仰多可喜。何以況清明。朝陽麗秋水。微雲會消散。豈久汙塵滓。所懷在分衿。藉草淚如洗。

與望之至八功德水

念方與子違。懽悅夜不眠。起視明星高。整駕出東阡。聊爲山水遊。以寫我心愴。知子不鋪糟。相與酌雲泉。

要望之過我廬

念子且行矣。要子過我廬。汲我山下泉。煮我園中蔬。知子有仁心。不忍鉤我魚。我池在人境。不與猿獺居。亦復無蟲蛆。出沒爭腐餘。食罷往遊觀。鱣鱣藻與蒲。清波映白日。擺尾揚其鬚。豈魚有此樂。而我與子無。擊壤謠聖時。自得以爲娛。

聞望之解舟

子來我樂只。子去悲如何。謂言且少留。大舸已凌波。聞讎雖莫測。皇明邁羲娥。脩門歸有時。京水非汨羅。

法雲

法雲但見脊細路埋桑麻扶輿度饑水窈窕一川花一川花好泉亦好初晴漲綠深於草汲泉養之花不老花底幽人自衰槁

彎碕

殘暑安所逃彎碕北牕北伐翳作清曠培芳衛岑寂投衣挂青枝數簞取一息涼風過碧水俯見遊魚食永懷少陵詩菱葉淨如拭誰當共新甘紫角方可摘

月夜二首

山泉墮清陂陂月臨靜路惜哉此佳境獨賞無與晤埭口哆陂陰要予水西去呼僮擁草垆復使東南注

二

踢月看流水水明搖蕩月草木已華滋山川復清發褰裳伏檻處綠淨數毛髮誰能挽姮娥俯濯凌波韞

兩山閒

自予營北渚數至兩山閒臨路愛山好出山愁路難山花如水淨山鳥與雲閑我欲拋山去山仍勸我還祇應身後塚亦是眼中山且復依山住歸鞍未可攀

卷二

古詩

題南康晏史君望雲亭

南康父老傳史君疾呼急索初不聞。未嘗遣汲谷簾水。三歲只望香爐雲。雲徐無心澹無滓。史君恬靜亦如此。颺然一去掃遺陰。便覺歎煩悵千里。歸田負戴子與妻。圃蔬園果西山西。出門亭臯百頃綠。望雲纔喜雨一犁。我知新亭望雲好。欲劇比隣成二老。莫嫌雞黍數往來。爲報襄陽德公嫂。

淳亭

朝尋東郭來。西路歷淳亭。衆山若怨思。慘澹長眉青。迸水泣幽咽。復如語丁寧。豈予久忘之。而欲我小停。歇鞍松柏間。坐起俯軒櫺。秋日幸未暮。奈何雨冥冥。

光宅寺

翛然光宅淮之陰。扶輿獨來止中林。千秋鍾梵已變響。十畝桑竹空成陰。昔人倨堂有妙理。高座翳遶天花深。紅葵紫萸復滿眼。往事無跡難追尋。

春日晚行

門前楊柳二三月。枝條綠煙花白雪。呼僮羈我果下騶。欲尋南岡一散愁。綠岡初日溝港淨。與我門前綠相映。隔淮仍見裊裊垂。佇立惓悵去年時。杏花園西光宅路。草暖沙晴正好渡。興盡無人檝迎我。卻隨倦鷁歸薄暮。

新花

老年少忻豫。況復病在牀。汲水置新花。取慰此流芳。流芳祇須臾。我亦豈久長。新花與故吾。已矣兩可忘。

四皓二首

四皓秦漢時招招莫能致紫芝可以飽梁肉非所嗜谷廣水渙渙山長雲泄泄與其貴而拘不若賤而肆

二

秦馭九州逃知力起經綸重利誘衆策頗知聚秦民頽然此四老上友千載魂采芝商山中一視漢與秦靈珠在泥沙光景不可昏道德雖避世餘風迴至尊嫡孽一朝正留侯果知言出處但有禮廢興豈所存

真人

予常值真人能藏毒而寧能納穢若淨能易羶使馨能解身赫赫能逆知冥冥日唯汝心櫻而汝耳目焚廓然而無營其孰擾汝靈神奇實主汝厥通莫之令嘻予豈不知黃帝與焦螟死心而廢形乃可少聞霆顧今親造之於吾獨剽聆剽心事斯語自儆以書銘

寄蔡氏女子二首

建業東郭望城西嶽千幃承宇百泉遶露青遙遙兮纒屬綠宛宛兮橫逗積李兮縞夜崇桃兮炫晝蘭馥兮衆植竹娟兮常茂柳蔦綿兮含姿松偃蹇兮獻秀鳥跂兮下上魚跳兮左右顧我兮適我有班兮伏獸感時物兮念汝遲汝歸兮攜幼

二

我營兮北渚有懷兮歸女石梁兮以苦蓋綠陰陰兮承宇仰有桂兮俯有蘭嗟汝歸兮路豈難望超然之白雲臨清流而長嘆

夢黃吉甫

夢傳失之妄。一作悲。晝翼見而想。豈伊不可懷。而使我心往。山林老顛胸。數日占黃壤。舟輿來何遲。北望
塵襟悅。西城薺花時。落魄隨兩槳。歲晚洲渚淨。水消煙渺莽。躊躇壁上字。期我無乃迂。

遊土山示蔡天啓

定林瞰土山。近乃在眉睫。誰謂秦淮廣。正可藏一牒。朝予欲獨往。扶僊強登涉。蔡侯聞之喜。喜色見兩頰。
呼鞍追我馬。亦以兩黥挾。斂書付衣囊。裹飯隨藥笈。脩脩阿蘭若。土木老山脅。鼓鍾臥空曠。簞簞雕捷業。
外堂廓無主。考擊誰敢輒。坡陀謝公冢。藏棹久穿刼。百金買酒地。野老今行餽。緬懷起東山。勝踐比稠疊。
於時國累卵。楚夏血常喋。外實備艱梗。中仍費調燮。公能覺如夢。自喻一蝴蝶。桓溫適自斃。苻堅方天厭。
且可緩九錫。寧當快一捷。彼哉斗筭人。得喪易矜怯。妄言屐齒折。吾欲刊史牒。傷心新城埭。歸意終難愜。
漂搖五城舟。尙想浮河楫。千秋隴東月。長照西州堞。豈無華屋處。亦捉蒲葵箠。碎金諒可惜。零落隨秋葉。
好事所傳玩。空殘法書帖。清談眇不嗣。陳迹恍如接。東陽故侯孫。少小同鼓篋。一官初嶺海。仰視飛鸞跼。
窮歸放款段。高臥停遠蹠。牽襟肘卽見。著帽耳纔壓。數椽危敗屋。爲我炊陳浥。雖無膏汚鼎。尙有羹濡筴。
縱言及平生。相視開笑靨。邯鄲枕上事。且飲且田獵。或昏眠委翳。或妄走超躐。或叫號而寤。或哭泣而覓。
幸哉同聖時。田里老安帖。易牛以實劍。擊壤勝彈鋏。追憐衰晉末。此土方岌岌。彘強偷須臾。樂撫事終愁。慄。
予雖天戮民。有械無接摺。翁今貧而靜。內熱非復葉。予衰極今歲。儻與雞夢協。委蛻亦何恨。吾兒已長鬣。
翁雖齒長我。未見白可鑑。祝翁尙難老。生理歸善攝。久留畏年少。譏我兩咕囁。束火扶路還。宵明狐兔慄。

蔡侯雄俊士。心懷形亦謀。異時能飛輕。快若五陵俠。胡爲阡陌間。跼足僅相躡。諒欲交轡語。怯子不能噲。

再用前韻寄蔡天啓

蔡侯東方來。取友無所挾。脩脩一囊衣。偶以一書笈。定林朝自炊。有匕或無筴。時時羹藜藿。饑大苦難變。驕頑遂敢侮。有甚觀駢脅。澹然山谷中。變色未嘗輒。始見類欺魄。寒暄粗酬接。從容與之語。爛漫無不涉。奇經可治疾。祕祝可解魘。巫醫之所知。瞽史之所業。載車必百兩。獨以方寸攝。微言歸易悟。疾若赴赴鐸。天機信卓越。學等何足躡。縱談及既往。每與唐許協。揚雄尙漢儒。韓愈眞秦俠。好大人謂狂。知微乃如諫。惟知造文字。人感鬼愁懾。秦愚旣改臯。新眊仍易疊。六書遂失指。隸草矜敏捷。誰珍檀山刻。共賞蘭亭帖。東京一祭酒。收拾偶予愜。少嘗妄思索。老懶因退怯。侯方習篆籀。寸管靜嘗壓。深原道德意。助我耕且獵。昔功恐唐捐。異味今得饒。京口媚學子。追師嘗刮刮。陸羸淮汴糧。水儻湖海牒。遠求而近遺。如目不見睫。僞鳳易悅楚。眞龍反驚葉。聞予再三歎。往往心不厭。或自逸而走。或吐而不噤。或嗤元郎漫。或訛白翁噤。鑽金徒欲消。韞玉豈愁浼。賢愚有定分。咄汝無嚶喋。跨鞍隨我遊。曳屣聯我跼。照泉挹清泚。跋石緣鬼業。東陂數儵魚。西崦追蛺蝶。翳林窺搏黍。藉草聽批頰。黃尋遠蓮鬚。紅閱鄰杏靨。荏苒光景流。楊園忽無葉。扶痾歸未久。吾見喜寧帖。褰裳告我去。祿仕當隨牒。蕭晨秣款段。歸騎得追躡。謂言循東路。覆出西城堞。行矣忍羈旅。無魚勿彈缺。天閑久索驥。駿足方騰蹀。長驅勿驕矜。小跪亦勿慄。鵬飛九萬里。勿借風一篲。溟波浩難窮。勉自養鱗鬣。爵祿實天械。功名爲接摺。寧能復與我。搖漾秦淮楫。附書勿辭頻。隔歲期滿篋。用前韻戲贈葉致遠直講

葉侯越著姓。胄出實楚葉。縉雲雖窮遠。冠蓋傳累葉。心大有所潛。肩高未嘗脅。飄飄凌雲意。強禦莫能攝。辟雍海環流。用汝作舟楫。開胸出妙義。可發矇起矓。詞如太阿鋒。誰敢觸其缺。聽之心凜然。難者口因噤。搏飛欲峨峨。鍛墮今跼跼。忘情塞上馬。適志夢中蝶。若金靜無求。在治惟所挾。載醪但彼惑。饋漿非我謀。經綸安所施。有寓聊自愜。某經看在手。某訣傳滿篋。坐尋某勢打。側寫某圖貼。攜持山林屐。刺擿溝港鰈。一抨嘗自副。當熱寧忘筴。反嗤襦襤子。但守一經笈。亡羊等殘生。朽筴何足摺。歡然值手敵。便與對匕筴。縱橫子墮局。膈膊聲出堞。樵父弛遠擔。牧奴停晏饁。旁觀各技癢。竊議兒女囁。所矜在得喪。聞此更心慄。熟視籠兩手。徐思撚長鬣。微吟靜悄悄。堅坐高帖帖。未快巖谷叟。斧柯嘗爛漚。趨邊恥局縮。穿腹愁危業。或撞關以攻。或覷眼而壓。或羸行伺擊。或猛出追蹶。垂成忽破壞。中斷俄連接。或外示閒暇。伐事先和變。或冒突超越。鼓行令震疊。或粗見形勢。驅除令遠蹶。或開拓疆境。欲并包摠攝。或僅殘尺寸。如黑子著罅。或橫潰解散。如尸僵血喋。或慚如告亡。或喜如獻捷。陷敵未甘虜。報仇方借俠。諱輸寧斷頭。悔誤乃批頰。終朝已罷精。既夜未交睫。翻然悟且歎。此何宜刼刼。孟軻惡妨行。陶侃懲廢業。揚雄有前言。韋曜存往牒。晉臣抑帝手。梭侯何啻涉。治城子爭道。拒父乃如輒。爭也實逆德。豈如私鬪怯。藝成况窮苦。此殆天所厭。如今劉與李。倫等安可躡。試令取一毫。亦乏寸金鑷。以此待君子。未與回參協。操具投諸江。道耕而德獵。

白鶴吟示覺海元公

白鶴聲可憐。紅鶴聲可惡。白鶴靜無匹。紅鶴喧無數。白鶴招不來。紅鶴揮不去。長松受穢死。乃以紅鶴故。北山道人曰。美者自美。吾何爲而喜。惡者自惡。吾何爲而怒。去自去耳。吾何闕而追。來自來耳。吾何妨而

拒吾豈厭喧而求靜。吾豈好丹而非素。汝謂松死吾無依邪。吾方捨陰而坐露。

示安大師

道人深北山爲家。宴坐白露眠蒼霞。手扶稅杖雖老矣。走險尙可追麝。踞堂俯視何所有。窈窕樛木垂榱榱。深尋石路仍有栗。持以饋我因烹茶。

示寶覺

宿雨轉歊煩。朝雲擁清迥。蕭蕭碧柳輕。脈脈紅蕖靚。默臥如有懷。荒乘豈無興。幽人適過我。共取牆陰徑。定林示道原。

昨登定林山。俯視東南陔。但見一方白。莫知所從來。濕銀注寒晶。奩以青培堆。迢迢掩靄中。疑有白玉臺。是夕清風興。煩雲豁然開。常娥攀桂枝。顧景久徘徊。杖藜忽高秋。陳迹與子陪。壯觀非復昔。平蕪夜莓苔。我所思寄黃吉甫。

我所思兮在彭蠡。一奩寒晶徑千里。天低紺滑風靜止。月澹星渟尤可喜。亦復可憐波浪起。琉璃崩嵌湧顛索。萬斛之舟簸一葦。超邑越都如歷指。岸沙雪積山雲委。雲半飛泉挂龍尾。跳空散作平地水。牛乳芳甘那得比。蘿爲冥冥蔭演迤。稍上尋源出奇詭。像圖釋迦祠老子。臺殿掩靄相重累。石槽環除逗清泚。松竹靚深無虎虺。其徒翛然棄塵滓。雖未應真終適己。黃侯可與談妙理。視棄榮宦猶弊屣。每採紫芝求石髓。我欲從之劬遊徙。穀城公孫能若此。五老聞之當啓齒。寄聲五老吾念爾。相見無時老將死。

寄朱昌叔

西安春風花幾樹。花邊飲酒今何處。一盃塞上看黃雲。萬里寄聲無鴈去。世事紛紛洗更新。老來空得滿衣塵。青山欲買江南宅。歸去相招有此身。

與僧道昇二首

昇也初見我。膚腴仍潔白。今何苦而老。手脚皴以黑。聞有道人者。於今號禪伯。勸汝以一句。西歸瘦如臘。汝觀青青枝。歲寒好顏色。此松亦有心。豈問庭前柏。

二

跋陀羅師能幻物。幻穢爲淨持。幻佛。佛幻諸天以戲之。幢幡香果助設施。茫然悔欲除所幻。還爲幻佛力所持。佛天與汝本無間。汝今何恭昔何慢。十方三世本來空。受記豈非遭佛幻。

贈彭器資

鄱水滔天竟東注。氣澤所鍾賢可慕。文章浩渺足波瀾。行義迢迢有歸處。中江秋浸兩崖間。迢迢與我相往還。我挹其清久未竭。復得縱觀於波瀾。放言深入妙雲海。示我仙聖本所寰。楞伽我亦見髣髴。歲晚所悲行路難。

贈王居士

武林王居士。與子俱學佛。以財供佛事。不自費一物。

贈李士雲

李子山水人。而常寓城郭。毫端出窈窕。心手初不著。我聞大梵天。擎跨雞孔雀。執鈴揚赤幡。浩劫淨無作。